



**LOMIGA**

**Januari**

**Feuari**



# Anotusi

LAUGA FA'APITOA	2
OFISA LAMEPA	4
FONOTAGA LMS	4
PEPA LMS REV DR. ELIA TA'ASE	5
FONOTELE FA'AFUASE'I EFKAS	8
TAULA'I I LE ATUA E LE'O LE MATAGI	9
MO TUPULAGA TALAVOU	10
SOLO FA'ALEAGAGA	12
LISI AUFALGALUEGA AGAVAA TAUSI AULOTU	13



## FONOTAGA A LE LMS 2025

*"Fa'auta, o le mea e matua lelei ma le matagofie lava, pe a nonofo fa'atasi lava o uso. Ua tusa ma le suau'u lelei i luga o le ulu, na tafe ifo i le 'ava, o le 'ava lava a Arona, na tafe ifo i le ua o ona ofu. E tusa ma le sau i Heremoni, ua toto ifo i luga o mauga o Siona; aua na poloa'i le Ali'i ia o'o i ai lana fa'amanuia, o le ola lava lea e fa'avavau." (Salamo 133: 1-3)*



## FONOTELE FA'AFUASE'I EFKAS

**2025**

*"Ia outou pepese atu i le Ali'i i le pese fou; aua o vavega na na faia; o lona a'ao taumatau, o lona lava a'ao paia, ua ia fai ai le olataga."*

**Salamo 98: 1**

# O LE LAUGA

Manatu Autu: Manuia Tumau! (*The Enduring Blessings!*)

Feagaiga Tuai: Faataoto 12:24-28

Feagaiga Fou: Galuega

**Matua: Faataoto 12: 24.** - “*E manumalo lima o e filigā i galuega; a o le paiē, e fai taulaga o ia.*”

O le tusi lea Fa’ataoto o lo’o aumaia i le mataupu 1:1 o le e ana le tusi; **‘O fa’ataoto a Solomona le atali’i o Tavita, le tupu o Isaraelu’**. I se suesuega lata mai, o lo’o aumaia ai le faamaoniaga o Solomona lea e ana upu ma faamatalaga *Fa’ata’oto 1-9*, O a’oa’oga fo’i a lona tamā o Tavita faatasi ai ma lona ole atu i le Atua ina ia foa’i ia te ia le loto matala *Tupu 3:9-14*. E ui o lo’o i ai nisi taofiga ma sa’iililiga. A o le Tusi lava o Fa’ataoto o se Tusi o fautuaga, a’oa’oga, ma solo e uiga lea i le olaga ma le soifuaga i aso fai so’o.

E tusa ai ma le matua, e lua nai upu e fia faamamafa e tala faasoa ai mo se feau faaleagaga.

1. O le filigā.

O le filigā e taumafai i le amiotonu, agalelei, agaalofo, filemu, amio lelei, faamaoni, galuega malosi, ma faatino galuega lelei ma nisi lava uiga faalia etc.

2. O le paiē.

O le paiē, o le amioleaga, ola to’atasi, agaleaga, fa’aoleole, e leai se faautauta/poto, taufaasesē, e musu i le faalogo/usita’i, ma faataliga tuli ma nisi lava uiga e aofia i lea faiga etc.

O upu ia e lua o loo faamamafa mai e le poto, e mafai ona i ai se malosiaga i folafolaga ma galuega, e ono manuia ai le tagata, ma ono aafia ai fo’i le tagata i le malaia. Peita’i, i le afa mulimuli o le mataupu lea 12. O loo aumai faatasi ai o taunuuga e maua e le tagata filigā ma le tagata paiē. E ui ese’ese o laua uiga ma manuia e maua, ae tasi lava le ala lea o loo laua tausiniō i ai; **O le Taunuuga.**

O le tala faasoa o le Poto e uiga i le manuia faalelalolagi. O manuia ia e mafai ona maua soo se tagata. E mafai ona maua e le paiē, pe afai e tele se avanoa o le ola e toe tula’i ai ma galue. E maua fo’i i lē o loo filigā auā o loo ia galue pea. O lona uiga e tele se avanoa e maua ai e le tagata manuia ia faalelalolagi.

Peita’i, o le manuia faalelagi, e le maua e tagata uma; ma e le maua gofie fo’i e se tagata. Auā o le manuia

lea e maua e le tagata e galue ma le onosa’i. E galue ma le finafinau, loto alofa, loto tele, ma le loto maulalo. E le faalogologo tigā. E le galue mo se manuia mo ia lava ma lona aiga. O le tagata e maua manuia ma tufa atu i e matitiva, ma fesoasoani i e puapuagatia. E galue mo le faamautuina o le viiga o le Atua i le lalolagi.

O le filigā fo’i e faalogo ma usita’i i le siufofoga o le Atua, ae le o matagi malolosi. O le tagata e lavatia tatali le ta’uleagaina i le faia o galuega lelei. E tausisi i le faamativa ina o ia lava mo le ola taumafai o isi. E ofo le ola atoa e tautua ai le Atua i soo se tofiga ma soo se valaauina. E na te amanaiaina le Atua ma lona siufofoga.

**Feagaiga Fou:**

E lua manatu faatusa e tau faamanino ai se manatu faatauvaia i le filigā ma le paiē.

O le fa’ata vaai mamao (*telescope*).

O lea fa’ata e mafai ona manino mamao i mea e le oo i ai le malosiaga o le vaaiga o mata.

O le fa’ata vaai i mea nini’i (*microscope*).

O lea fa’ata e manino ai le vaai i mea nini’i e le mafai i le malosiaga o mata ona iloa tino. E mafai ona fa’atelē mea ia iloa lelei poo se siama/manu itiiti.

O ia fa’ata e lua ua faatusa ia manino pe iloa lelei ai le siosiomaga ma le lalolagi o loo tatou ola ai nei. A fesili i le fa’ata vaai mamao, o le tagata e mamao lona silasila ma manatunatu pea i mea e manuia, ae **alo ese** mai i ni faaletonu ma le fa’atamala. A fesili fo’i i le fa’ata vaai i mea nini’i, o le tagata e iloa lona faatauvaia, e iloa le **Vā** o ia ma lona matai. E tausisi i le alofa, ma naunau i le faamaoni, ina ia manino i uiga lilo o le amiotonu o le Atua i lona finagalo i le lalolagi.

O tusinga ma faamaumauga o le foma’i o Luka. O loo tuliloa ai nisi o faalologo ma i latou/se tasi, na afua ai le tusi. I le ma leni mau **“O Galuega a le Au Aposetolo”**, o loo taumafai lava le Fai-Evagelia o Luka, e faamautu le tala lava ia Iesu; lea e afua ai ona lailoa le ‘Au Aposetolo e tala’i pea le finagalo o le Atua soifua, e ala i le Keriso toe tu o Iesu lea. E tusa ai la ma ia faamaumauga. Sa tala faasoa Luka i le mataupu leni 25:1-12 i le i ai o Paulo i le faamasinoaga. O lea faamasinoga na afua mai i se fete’enaiga sa tupu i Ierusalem, ina ua tau ane tagata Iutaia mai Asia o i latou ia sa tau lamalama ia Paulo. Ae ina ua taunuu Paulo Ierusalem ma faatasi atu ai ma toaina ma le ‘au ositaulaga i le malumalu; ona pu’e ai lea ia ma taumafai e faaoo le oti ia te ia. Peita’i, na molia i le faamasinoga. O le sini/auga o aute i lea fete’enaiga, ona o le

tala ia Iesu na maliu, ae molimau Paulo ua toe soifua, faatasi ai ma le mataupu o le faamamaina (Galuega 21-26). O nei tuuaina sa tupu ai le feteenaiga o lagona o tagata, ae atili ai ona lilivau nifo o tagata lutaia le talitonu, ma nisi o le 'au Ositaulaga ma le 'au Faresaio e fia faaoo le oti ia Paulo; aua ua le gata i lona molimau e uiga ia Iesu lea na maliu ma toe soifua i le aso tolu. A o lona taliaina o tagata nuu ese sa ta'ua o tagata e le faapaiaina, lea ua liua (transform) e avea ma tagata Kerisiano.

O le alofa ma le faamaoni o Paulo i lona faasinomaga, na ia filigā ai e faataunuaina pea lana faamasinoga, ina ia faia ai le amiotonu, aua o ia o le tagata Roma. O lona uiga e lē tatau ona faaleaogaina le tuuaina o ia e tagata lutaia ma le 'au toeaina, e aunoa ma se iuga e faatinoina. Auā o le solitulafono lea, poo le lē faia lea o le amiotonu. Paulo i le faamasinoga o Kaisara.

O le alofa ma le faamaoni fo'i o Paulo i le Atua, e tusa ma le ala lava i Tameseko, na se manu a fano ai Paulo i lea ala. Ae faauta, le tautinoga o le Aposetolo, sa fa'aalia ai lava le amiotonu o le Atua ia te ia i lea lava mea. Sa liua ai e Iesu lona ola mapugatamai e tusa ma lona usita'i i tulafono a Mose ma faatonuga o le 'au tusiupu ma ositaulaga. Ae suia filigā i le fai ai o ia, ma 'va'a ma ipu e momoli le finagalo o le Atua e lē na o Isaraelu, a ia so'o tuluiga uma o le lalolagi (Galuega 9).

#### Application

O le alofa ma le faamaoni a lē galulue faatasi e lē manino fa'aata vaai mamao ma le fa'aata vaai i mea nini'i o le ola. E le mafai fo'i ona galue to'atasi na o le alofa, auā e lē tino mai ai le amiotonu o le Atua i le lalolagi. E mo'omia e le filigā ma le paiē, ona taumafai e ola i le agaalofo ma le agalelei i soo se tasi. Ia maua le filemu ma le loto maulalo, ia i ai faatasi ma le amiotonu; aemaise le tausinioga o le 'au faatuatua i le Manuia Tumau. E le mafai ona tino le amiotonu pe afai na o le alofa, e faapea fo'i pe afai ua na o le faamaoni. E tatau lava ona galulue faatasi le alofa ma le faamaoni ona mautinoa lea o le amiotonu o le Atua ma ona faamanuiaga i lo tatou ola ma galuega faatino.

Le Au Pele, o tagata faatuatua ua liua i le finagalo alofa o le Atua i le lalolagi. E silafia e le Atua mea uma e pei o fa'aata faatusa sa ta'ua. O lona Agaga Paia o loo galue mai lava i lo tatou si'osi'omaga ma soifuaga o loo tatou ola ai i aso fai soo. Peita'i le 'au Kerisiano, o e ua

talitonu i le Alo o le Atua na afio mai mo le togiola ina o le lalolagi, ona o le suafa o Iesu Keriso, o loo fia faaoga e le Atua lo outou soifua tautua mo lana galuega tala'i. O loo fia fa'aoga e le Atua lo outou soifua tautua galue, mo lona Ekalesia. O lea valaaulia, e fia laveaina mai ai le ola, mo Lona Viiga.

A e afai o lo'o tatou taofiofi i lagona ma manatu, o lona uiga o loo tatou manana'o lava i le ola/soifuaga e ta'amilomilo mamao solo, e faalia le iloa ma le malamalama, ma i'u ai lava i le faamalieina o le mana'o; ma faiaina ai i le malaia; ae lafoa'i le Atua ma lona musumusuga e ala i lona Agaga Paia. A o le fesili e faatupu ai le ola fia tautua pea, 'O fea la e tatou te aga'i ai?

Le Ekalesia ma le 'au faitau o le Lamepa. Ua folau lo tatou sa i lenei tausaga, ae tuana'i faigata ma fita o lena tausaga. O le a so tatou tali atu i le alofa ma le faamaoni o le Atua, ma ana faamanuiaga faaaauu pea ua le gata i lena tausaga a o lenei fo'i tausaga ma lona amataga. E le tu'ulafoaina lava i tatou e le Atua. O le Atua ma lona amiotonu, e faalia i soo se taimi. O lana pule to ma lana pule faitoatasi, e faalia ai lona manuia e tumau, e le liliu lava.

E ui lava ina faitio le 'au Aposetolo ma upu taufaifai, agaleagaina, ma tu'uaia leaga o tagata ma saili masei ma le taulamalama. O le alofa ma le faamaoni, e faamativa ai le gaogao ma le iloa. E galue ma le onosa'i. E finafinau i le amiolelei aunoa ma le faalogologo tigā. E faalagolago i le Atua ma lona faasinomaga. O le Atua e to'a ai galu fafati, ma matagi malolosi, i lona lava amiotonu faalia. "E manumalo lima o e filigā i galuega; a o le paiē, e fai taulaga o ia." Ona o Iesu. AMENE!!!

Saunia Ofisa Lamepa

*A cord of  
three strands  
is not easily  
broken*

## Ofisa o le Lamepa.

E ofo alofa ma faatalofa atu i le 'au faitau o le LAMEPA. I le suafa mamalu le **Atua** o le **OLA**, Iesu le **FAAOILA**, ma le **Agaga Paia**. E avea ai lea avanoa matou te tuuina atu ai le lima faafeiloa'i ma faamanuiaga o lenei Tausaga 2025. Malo le folau, i le mamalu o le Ekalesia aoao, Susuga i Toeaina ma Faletua Toeina, Faifeau ma Faletua, A'oa'o ma Faletua, alii Tiakono, Tina Tiakono, Mafutaga a Tinā Aoao, uso Ekalesia, uo ma e masani, Tamā ma Tinā matutua e oo lava i alo ma fanau. O le viŕiga ma le faŕafetai i le Atua, ina ua gase atu vevesiga ma ni atu faigata, faapea galu fafati o lena tasaga 2024.

O upu a le Fai-Salamo 23... *“O le Alii, o lo'u leoleo mamoe o ia; e leai se mea ou te mativa ai; na te ave a'u i le mea e i ai le vao mu'a ou te taoto ai. Na te ta'ita'i ia te au i tafatafa o vai e tafe lemu; na te faafosia mai lo'u agaga; na te ta'ita'i ia te au i ala o le amiotonu ona o lona suafa. E ui lava ina ou savali i le vanu o le ata o le oti, ou te le fefe lava i se mea leaga; aua o oe ta te faatasi ma a'u; o lau laau ma lou tootoo e faamafanafanaina ai a'u. E te laulau mai mea i le laoai ma a'u i luma o e ita mai ia te au; ua e faauuina lo'u ulu i le suauu; ua taumasuasua la'u ipu. E moni e mulimuli mai ia te au le agalelei ma le alofa i aso uma o lo'u ola; ou te nofo foi i le fale o le Alii i aso e tele lava.”*

O lea se agaga tatou te folau lagi mā ai i le tai loloto o lenei Tausaga fou. E tusa ma le pese faamalosi a le tama Eperu, *“O le Alii o le leoleo i lo tatou ola; e tatou te le mativa lava i se mea e tasi; e na te faafosia o tatou agaga ina ua faavavau faatasi ma tigā; e na te ta'ita'i lona fanau faatuatua uma faatasi ai ma le lalolagi i ona lava ala ina ia manuia; e ui lava tatou te i ai pea i le faitotoa o le agasala, tigā, ma puapuaga, e oo i le oti, ia aua lava ne'i o tatou faavaivai, ma fefefe ai; auā e iai lava le Atua i soo mea, e na te faatasi mai pea ma i tatou; a o tua atu o nei faigata uma, o loo tumau pea lona agalelei ma le alofa i aso uma o lo tatou ola, e oo i le faavavau, faavavau lava. E faamaoni lava le Atua.”*

O le tatalo, ia maua le agatonu o ana afioga i o outou fingalo, e magalo ai se vaivaiga o lenei ofisa e tusa ma ni faaletonu i tausaga tuana'i atu. A ia taitaia e lona Agaga, le savaliga ma le folauga umi o lona Ekalesia ma ona tagata i lenei tausaga fou. O le Manulauti o le Lotu Talosaga i le amataga o lenei tausaga. O Folafolaga ma Taunuuga (Promises and Solution). O le Upu ua liutino ia Keriso Iesu, o folafolaga mai anamua o le a faatunuina. O le agalelei ma le alofa tumau lea o le Atua i ona tagata i aso uma o le ola, a o feagai ai fo'i ma galuega ma a'oa'oga i lenei tausaga.

Ia manuia le Ekalesia ma le 'au faitau o le Lamepa.

Ona o Iesu, Amene!

## **FONOTAGA MAFUTAGA A TAGATA O LE (LMS) KANANA FOU (EFKAS)**

**IANARI 27-29, 2025**

Ianuari 27 aso Gafua i le afiafi, na faataunuaina ai le Fono Tele Aoao a le Mafutaga a Tagata o le (LMS); Aukilani, Samoa, & Amerika Samoa, i le aai o Kanana Fou le Laumua o le E.F.K.A.S... O lea mafutaga na molimauina ai le agaga fetufaa'i o mafutaga/lala ta'itasi, i le faatauaina o le agaga ua tasi(unity).

O le sauniga amata na faataunuaina i le Maota/Fale o le Mafutaga a Tinā Aoao, ta'ita'ia e le Sui ta'ita'i Fono o le (EFKAS) Rev. Elder Dr. Leatulagi Falevao. O le maea ai o le sauniga amata, na saunia ai e le Susuga Rev. Elder Dr. Elia Taase, se Tala ootoo/Pepa o lea Faalapotopotoga/Sosaiete Mafutaga a Tagata o le LMS. E aofia ai suiga iloga sa taumafai mai ai le Mafutaga Aoao/Mafutaga o lala ta'itasi, se ia oo mai lava i nei ona aso.

## **FONO TELE MAFUTAGA A TAGATA O LE LMS (MTL) PICC, EFKS, & EFKAS.**

**Tala ootoo/Pepa a le MTL  
Rev. Elder Dr. Elia Ta'ase.**

Sa fa'auau ina lea lava fonotaga i le aso Lua Ianuari 28,2025, ma le aso Lulu Ianuari 29,2025 o le aso mulimuli fo'i lea. E tele mataupu iloga sa fetufatufaa'i i ai le Mafutaga/lala ta'itasi. O se tasi o mataupu iloga ma o le faamalosi fo'i lea i mafutaga/lala ta'itasi. Ia alofagia le faaolaolaina o le Faalapotopotoga/Sosaiete, i le faailoa atu i Ekalesia ma nisi o loo fia auai ma mafuta i lea Mafutaga o le LMS.

Na maea ma tapunia le fonotaga Mafutaga a Tagata o le LMS i le Sauniga faai'u, na saunia e le Ta'ita'i Fono o le Mafutaga/Lalal i Amerika Samoa, Rev. Elder Dr. Tony Hollister. O le fonotaga a le Mafutaga a Tagata o le LMS Aoao o loo lumana'i nei, o le a faataunuaina lea i le aai o Aukilani i Niu Sila ia Ianuari, 2026. Faamoemoe lava i aao ta'ita'i o le Atua Soifua, e aulia uma i ai le ola ma le malosi, mo lea Mafutaga matagofie. O le atoaga o lea mafutaga e mafai ona silasila i luga o uepga tafailagi a le EFKAS MEDIA.

**<https://www.youtube.com/> [www.facebook.com/  
@EFKASMedia](https://www.facebook.com/@EFKASMedia)**

**PEPA O LE FONOTAGA MAFUTAGA  
A TAGATA O LE LMS (MTL), PICC,  
EFKS, & EFKAS.**

**Saunia le Susuga Faifeau Toeaina  
Foma'i Elia Ta'ase.**

Ua faaulu tala ina lenei tautalaga mafutaga tagata o le LMS poo le MTL, a le ekalesia faapotopotoga soofatasi Niu sila, le EFKS, ma le EFKAS. Sina tala i ona amataga ma taofiga autu ma aga'i atu ai i se faafouina i le lumana'i. Na ulua'i fa'aigoaina le mafutaga i le igoa e fa'aperetania o le **LMS (ex-pupils fellowship) PICC**, Niu Sila. Sa masani ona fa'aigoaina i lenei igoa, o le Mafutaga po o le Asosi a le Tama Tuai o le LMS. O lo'o fa'aigoaina i se su'esuega mulimuli ane i le igoa fa'aperetania fo'i, "**The Fellowship of Old Students of LMS Schools in Samoa**". O le fa'avae na pasia ia Ianuari 8, 1998 na suia ai le igoa i le Mafutaga o le LMS. Ua ou fa'aigoaina i lenei afaifi e fa'apea, "Mafutaga a Tagata o le LMS" Ekalesia Fa'apotopotoga So'o Fa'atasi a Niu Sila ma le PICC, EFKS, ma le EFKAS. O le fa'amoemoe, ia ave ese le manatu o lo'o ta'atele i tagata, ua na o le afaifaluga faifeau ma faletua, ma nisi na fa'au'u i aoga o le LMS i Samoa; e talia ma avea ma tagata o le mafutaga. O se fa'amalosia fo'i lea i tagata uma o lo'o lolotu i le Ekalesia Fa'apotopotoga Kerisiano i Samoa, Ekalesia Fa'apotopotoga Kerisiano i Amerika Samoa, Ekalesia Fa'apotopotoga So'o Fa'atasi i Niu Sila, *Congregational Union in New Zealand (CUNZ)* ma le (EPANS), ua ou fa'asamoaina ai "**Presbyterian Church in Aotearoa New Zealand**". O le manatu, ia o'o atu i tagata uma o lo'o lolotu i ia Ekalesia o le MTL, e aofia ai tagata uma, faifeau, a'oa'o, tiakono, ma faletua, tagata lotu e o'o lava ia tatou fanau.

O le MTL ma ona amataga i le tala faasolopito. O upu a le atunuu e le faalala fua se niu, faalala ina ua agi i ai le matagi. O le tasi o uiga o ia upu, e leai se mea e tupu fua i le soifuaga. E i ai mafuaaga o mea uma, e i ai mafuaaga maotua i le tala faasolopito, e sauniuni malie ai tulaga o mea uma mo le amataga ma le faavaeina o se mea. E i ai fo'i mafuaaga e latalata i le faavaeina e mafai ma faatoa mafai ai, ona amata le mea sa fuafua mai.

O mafuaaga i le tala faasolopito poo le (background courses). O le background po tualeele, po tuafanua o le MTL. O loo taoto i le tala faasolopito o Aoteroa Niu Sila i ana fesootaiga faa-malo ma faa-ekalesia fo'i, ma Peretania, ma Atunuu o le Pasefika. Mai fesootaiga ia na amata ai ni gaioiga, na aga'i atu ai le faavaeina o le MTL. O fesootaiga faapitoa faa-malo a Niu Sila ma Peretania. Na amata lava ina ua faatoa asia Niu Sila i le alii va'a Peretania i le tausaga 1769. Na

manino ai e le lalolagi motu e lua o Niu Sila, ina ua folau faataamilo faatolu ai le alii o **Kapeteni Kuki**, ma tuuina ai motu a Niu Sila i le faafanua o le lalolagi. Na amata mai i inā gaioiga masani o tagata gaasolo, e aīnā atunuu fou. O tagata saili i le tamaoiga. O tagata e su'e maa taua ma oloa taua. O tagata saili ni oloa e gaosi ai tamaoiga i atunuu e omai ai. O tagata e faavaeina malo e atia'e i atunuu, ma le toatele sa aofia ai Misionare.

- O le tausaga 1839, na avea ai Niu Sila ma kolone (*colony*) o Peretania i le faaopoopo/fa'aaofia (*by annexation*).
- O le tausaga 1841, na avea ai Niu Sila ma (*crown colony*) o Peretania. Le uiga o lenei igoa poo le ta'u, o se atunuu e sa'oloto, ae aofia pea i lalo o le puleaga a le tupu o Peretania ma le malo o Peretania. I lalo o le tulaga faapitoa lea, na avea ai Niu Sila ma atunuu faapitoa i tulaga faamalo i le Pasefika. Na feso'ota'i vāvā lalata ai ma atu motu, sa i lalo o Peretania. E pei o le atu **Kuki**, o **Niuē**, e aofia ai fo'i ma **Tokelau**.
- O le fesootaiga fo'i lea ma Peretania na vave oso mai ai Niu Sila e ave faamalosi Samoa mai ia Siamani i le 1914, ina ua amata le taua muamua o le lalolagi (*World War I*). E lua mea taua mo le amataga o le MTL, na amata i le fesootaiga taua lenei. Muamua, na ulua'i oo mai ai le lms i niu sila e ala i le galuega tala'i masani a le sosaiete i le va 1814 ma le 1838.

O lea ulua'i fesootaiga na fa'avaeina ai Ekalesia Fa'apotopotoga i Niu Sila aemaise o le Ekalesia Fa'apotopotoga So'o Fa'atasi, na iloa i le igoa *Congregation Non Union in New Zealand (CNUZ)*. O fesootaiga taua nei na avea ai Niu Sila ma atunuu fa'apitoa i le galuega tala'i a le LMS. Na avea ai o se Ekalesia ua i ai Ekalesia Fa'apotopotoga na fa'avae ai, ma avea ai o se tasi o atunuu na aofia i le vaega o atunuu ua ta'ua o le **Home Base** o galuega a le LMS. Le igoa lea sa ta'u ai Ekalesia sa latou lagolagoina ma va'aia fa'apitoa le ola o Misionare galulue i **Mission Fields** a le LMS.



O le *Home Base* e aofia ai Ekalesia Fa'apotopotoga i Peretania tele e Egelagi (*England*), Uelese (*Wales*), ma Skotilani (*Scotland*) atoa ma Niu Sila, Ausetalia, ma Aferika i Saute. O nofoaga ia sa filifili mai ai Misionare ma a'oa'oina ai fo'i nisi o Misionare a le LMS, e sauni ai mo le auina atu i tafā eseese i galuega fa'a-Misionare. O i latou fo'i ia sa feagai ma le tausiga o Misionare galulue. E o'i ai e va'ai lo latou soifua maloloina, a o'o ina gasegase i ma'i o le tino, ona ave lea i Niu Sila po o nisi o na atunuu e latalata ane, ina ia va'aia ai le soifua o Misionare.

O se tiute fa'apitoa na tu'uina ai e le LMS po o Niu Sila fo'i ma Ausetalia, na tele ai ona litaea(*retired*) ai nisi o Misionare o le Pasefika; ma nonofo ai lava ma galulue ai pea; mo atu Motu o le Pasefika aemaise fo'i o Ekalesia i Niu Sila. O le ala fo'i lea na tatala ai faitotoa o latou Malumalu ma Tapuaiga i Niu Sila i tagata mai atu motu. E pei o tagata mai Rarotoga (*Rarotonga*), Niuē (*Niue*), ma Samoa. Sa latou talia ma le fiafia ma faia mea uma mo i latou sa ta'ua o alo ma fanau a le LMS, mai atunuu o le pasefika. O le mafua'aga fo'i lea na fa'avae ai le lotu fou sa fa'aigoaina o le *Pacific Islanders Congregational Church (PICC)*. O se vaega o le **CUNZ** sa fa'apitoa mo tagata Pasefika i le tausaga 1947. O lea galuega sa ta'ita'iina e nisi o Misionare sa galulue i motu o le Pasefika e pei o le alii lauiloa o **Reverand Charles/Misionare Salesa**, pei ona iloa ai e le Pasefika aemaise Faifeau a'oa'oina mai i atu motu i ia taimi. E pei o le Tamā ia **Leuatea Sio, Kenape Faletose**, ma nisi o uso sa galulue ai i Niu Sila i lea galuega.

Ina ua fa'atagaina tagata o atu motu, sa galulue ai le LMS ma maua feso'otaiga ma Niu Sila ma Peretania. Sa talia lelei i latou i Niu Sila ma fa'a-Ekalesiaina, ma oo lava ina ua fausia le Ekalesia Fou e tapua'i ai i latou i Niu Sila. O Tiute ia o le *Host Church* ma le *Host Nation* e pei o Niu Sila ma Ekalesia o Niu Sila.

- Mai le tausaga lea 1947, sa to'afilemu mea uma i Niu Sila ma galulue fiafia tagata uma i Ekalesia e pei ona i ai. O atu motu fo'i pei ona ta'ua sa latou galulue i le galuega. Peita'i, o le fa'ai'uga o le tausaga 1950; na amata ai ma i'u ane i le fa'avaeina o le MTL.

*“E tautala ma le fa'aeteete ona o nisi ia o mataupu 'ale'ale i ia taimi i le va o Ekalesia nei Samoa aemaise fo'i i Niu Sila”.* Tau lava ina pa'i i ai ina ia iloa ai le mea na mafua ai le fa'avaeina o lenei **Mafutaga a Tagata o le LMS**.

- O le amataga o le tausaga 1960, na amata ai ona afuafua le amataina o le Ekalesia Fa'apotopotoga

Kerisiano Samoa i Niu Sila. E o'o ane i le 1962, ua amata ona olaola ma ua lē toe lilo fo'i. Ua amata fo'i ni fete'enaiga i le va o tagata tapua'i e pei ona i ai. Na i'u lava na o'o ai i lenei tausaga i Samoa le tala, ma manatu ai le Ekalesia i Samoa e avatu ma auina atu ai se savali i le 1963; ina ia va'ai i le mea ua tupu.

- Oketopa i le 1963; na taunu'u ai le savali i Niu Sila e o'o ia Novema, ua uma le fa'ai'uga o le savali ua talia ai le Ekalesia Samoa muamua i Niu Sila ma tauoloa ai le savali. O le mafua'aga lea na tutupu ai fa'afitauli i Niu Sila, ma ua tele ai fete'enaiga i tagata; o alo ma fanau a Samoa aemaise ai le tete'e atu i le i'uga na faia e le savali.
1. Na fa'apea ai le tagata o le **PICC**, ia fua le taliaina i le fa'avaeina o le Ekalesia, e tapua'i ai alo ma fanau a Samoa o lo'o i Niu Sila. O le upu mātuiā lenei i finagalo o i latou sa i ai i lea taimi, aemaise i ta'ita'i Samoa o lo'o i ai i le **PICC**. O i'ina, na sa'ili ma o latou taumafai i le Ekalesia Samoa mo se fesosoani.
  2. I le taimi lea o le fevesiaiga auā e o'o lava i Samoa, na i ai lava ese'esega i Ekalesia. E ui ina faia e Komiti o Feau Eseese le i'uga, a e le'i tu'uina atu le fa'ai'uga e faia i le Fono Tele o le 1964, o le taimi lea na fa'avaeina ai le MTL.

O le tusi na auina atu i Samoa, taumafai e faamatala ai mea o loo tupu i Niu Sila. Sa faaalua ai le agaga faanoanoa o fanau, ma latou tusia ai se tusi na faailoa atu ai. E le gata i le faanoanoa, a'o le iuga o le tusi na tusia ia Tesema 1963. E ui lava i le faanoanoa ona o le fuafuaga ua oo i ai, o le a faaleagaina ai fo'i a matou fuafuaga; ua lua tausaga o faia mo ni fesoasoani mo le Ekalesia, ae o le a matou taumafai pea i se mea e mafai e fesoasoani ai i le Ekalesia.

Manatu nisi o le tusi tala o saunoaga na e faatatau i le Mafutaga a Tagata o le LMS ua faavaeina i le lua tausaga i tua i le 1961. Ae o le tusi tala toatasi ua tusia tala mai lea taimi, faamatalaina i le 1963 lava, le tausaga na faavae ai le Mafutaga. Na faavaeina ma o latou ofoina loa i le Ekalesia i Samoa se sikolasipi mo Faifeau e omai e āo'oga i Niu Sila mo se tausaga, e faailoa ai lo latou loto atu i le Ekalesia, o i latou lava o alo fo'i ma fanau a le Ekalesia i Samoa. Na talia lelei e le EFKS le ofo ua tuuina atu e le MTL mai Niu Sila, ma latou faai'uina ai le fono tele **1964**; ina ia talia le fesoasoani ua ofo ina atu mai Niu Sila, ma ia amata loa. Ia tofua le Matagaluega ma sui e faasolosolo mai, ma ia amata i le Matagaluega a Tutuila ma Manu'a.

1. Na amata i le Susuga ia **Panama**.
2. Sosoo ai ma le Toeaina ia **Fuata'i** mai Apia.
3. O **Mafa Papalii** mai i le itu o tane **1967**.

4. O le Susuga ia **Tapu Si'itagata** mai **Malua 1968**.
5. O le Tamā ia **Tema Koría** mai Aana **1969**.
6. O **Nofoaiga** mai le matagaluega Falealili **1970**.
7. O le susuga ia **Vitale Eti** mai le Faasāleleaga **1972**.

O le faataunuaina lenā o faamoemoega na fausia ai le MTL. Ina ia saunia ni fesoasoani mo le Ekalesia i SaLomi Tusimoa, aemasie le faatupeina o aoga a le Aufaigaluega i Kolisi i Niu Sila, ma fesoasoani ai fo'i mo le Ekalesia i Niu Sila.

## Otootoga o a latou galuega fa'atino.

1. O le galuega muamua lea e pei ona ou ta'ua. O galuega e lua, o le galuega na faia i Amerika Samoa. O le galuega o le **Fale a le Pule o Kanana Fou 1985 ma 1986**.
2. O le galuega o le **Fale Tusi "Ia Malamalama i Apia" i le 1973**.
3. O meaalofo tupe mo **Leulumoega** e lē o māua le tausaga sa faia ai. Ae na faafetaia lea mealofa i le Teutupe i ia taimi, le Susuga ia **Iona Levi**.
4. O le sikolasipi na ave i Tutuila, mo sē ave e a'oa'oina i mea tau Lolomi Tusi (**Book Printing**), e fesoasoani ai i le Ekalesia.
5. O fesoasoani na toe iloa mulimuli ane, i le tausaga **2002**. O le Fono i Aukilani na pasia ai fesoasoani mo le **TBT**, ma le **Kolisi Papauta**. Na faataunuina i le **2003** ma o'u matuuina atu ai ia meaalofo uma.

O le fono i Ueligitone (*Wellington*) 2009, na fa'amavae ai Aukilani e le o maua po o le a le mafua'aga. O le tausaga 2007 i Amerika Samoa na aumai ai mataupu mai lālā ta'itasi/mafutaga, ina ia taumafai e fa'aopopo ni mataupu fou i porokalama i fonotaga, su'esuega o Tusi Paia, aemaise o ni pepa e fa'amatala ai fesuiaga ma mataupu o loo tautalagia i ia taimi o le soifuaga. Ua fa'ai'uina ia tu'u i lālā o le a faia ai fono latou te fa'ataunu'uina. E avatu ai ma le mataupu ia ta'i lua tausaga ma fono. O le i'uga na faia ai, ia faia pea i tausaga ta'itasi, e mafuta ai le 'au uso a le LMS. O le Fono 2008, na fa'ataunu'u ai le i'uga e uiga i pepa ma a'oaoga faa-Tusi Paia. O le fa'anoanoaga o lea fono, na lē mafai ona auai Aukilani a e ua malolo mai lea taimi. E o'o mai lava i le fa'ai'uga, o faia pea lea tautua a le Mafutaga a Tagata o le LMS.

O le meaalofo mulimuli na faia 2018, o le talosaga mai o le EFKAS mo se fesoasoani mo le Iupeli. Na fa'amaopopo i le 2018, ae avatu i le 2019. Na tu'uina atu ai

le meaalofo **\$50,000 tala** mo le Ekalesia. O le fono lea e le'i mafai ona auai ai Ueligitone. O le Fono matagofie ma o se fono fiafia mea uma, a e na luagia i le fa'anoanoa ona ua lē auai uso mai Ueligitone. O lo'o manino mafua'aga na avatu, a e sa talitonu ai uma o le mea lava lea ua fai ma to'otuga, i le aga'i i luma o le Mafutaga. O le Fono lea na toe ave'ese ai le talosaga a Amerika Samoa, mo se fesoasoani ina ua iloa le mafatiaga ua i ai lālā. Po o le fono lea po o le fono mulimuli i le 2020, na fuafuaina ua le mautinoa pe na o'o; ina ua pepesi le **Koviti-19** i le lalolagi. Ua a'afia ai feoaiga aemasie i tatou uma i ia taimi. Na gata mai ai fo'i ma mafutaga a le LMS. O lenei, faato'a tatou toe fono po o ua atoa lava le lima o tausaga tatou te lē o mafuta. O taimi uma sa tete'a ai le mafutaga sa lagona lava le misia o le mafutaga i tausaga uma e pei ona tatou i ai, aemaise o le felosipi (*fellowship*) a lālā ta'itasi ma le Mafutaga atoa. A'o sauniuni Amerika Samoa mo lenei Fono, sa manatu e ave le tatou fono i Las Vegas. E pei ona i ai le manatu, o le a tele ai le fiafia o le au uso fono, lelei ai le mafutaga auā e faigofie le tausiga o le mafuta fa'atasi pea. Peita'i, ina ua fesoata'i atu i a tatou lālā, sa talosaga mai, tele fa'afitauli o Las Vegas. Ua toe manatu ai lālā i Amerika Samoa, o le a toe aumai le Fono i Amerika Samoa nei. A ia avea lenei Fono ma fono e toe fa'amaopopo ai le Mafutaga a Tagata o le LMS, ma ia amata ai se fa'afouina, e aga'i atu i le lumana'i pe a fingalo i ai la tatou mafutaga.

O le lu'i lenā mai ia Amerika Samoa i lenei tausaga i le tatou mafutaga a le LMS. A toe silasila i lo tatou amataga, na amata i ni fete'enaiga, na amata ina ua taumafai nisi o le 'au uso ina ia fa'ailoa o i latou fo'i ma i tatou uma o vaega o le galuega o le LMS, aemaise le EFKS, ma le EFKAS, ma lālā fo'i i Niu Sila. A tatou toe tepa i le tuana'i, e i ai lava fa'afitauli i ia taimi ona o lenei lava taumafaiga. O le mafua'aga lea ua aumai ai fa'aluluitau nei e le lālā mai i Amerika Samoa i lenei tausaga. Pe ua lē tataua ea ona toe silasila i ni faiga fou, e fa'ataunu'uina ai le agaga fa'a-LMS? O le agaga e Mafuta Fa'atasi, o le Agaga e sa'ili mo mea e fa'alia ai le tautua. E fiafia ma galulue ai tagata uma ae ia maopopo pea tatou Mafutaga.



## Toe Upu.

O le taumafaiga lenā o lenei afiafi. O le isi fa'amoemoe ua leva ona mana'o le Mafutaga i sana/sona tala tusitusia. Sa faigatā ona aoao fa'amatalaga e uiga i le tatou fono. E faigatā auā ua fai i lagi le folauga, ma ua o atu i tu'ugamau i latou na asaina le gasū o le taeao. O lo'o i ai tala sa i ai fa'amaumauga ua galo atu ma i latou pe afai e lē o fa'amaumauina i Niu Sila na amata ai. Pe afai fo'i e le o fa'amaumauina e le Mafutaga po o lālā ta'itasi o latou lava amataga. O le fa'amoemoe lea ia tatou amata i lenei tausaga ma lu'itauina i tatou, ma tatou toe sa'iliili o tatou lava laufanua, sa'iliili i totonu o lālā ta'itasi, ina ia iloa fa'amatalaga i le mafua'aga ma taimi na fa'avaeina ai lea lālā ma lea lālā; ma tu'ufā'atasi ai se fa'amoemoe mo le tatou Mafutaga.

Ia manuia le tatou mafutaga, ia tatou tau fai maua le fiafia. Ia mafai ona tatou maua auala fou e fa'alia ai le Mafutaga (*fellowship*) fa'a-LMS. E tatou te fesoasoani ai ta'ito'atasi, ina ia atia'e tagata uma e galulue i Ekalesia o lo'o tatou galulue ai ma le fiafia, ma le sa'oloto o Ekalesia Tuto'atasi. Ua leai se LMS ua toe i ai i lenei taimi. O le upu o lo'o ola na o upu tusitusia, ua tauaveina nisi o Sosaiete ma nisi taumafaiga o galuega sa faia e le LMS, lea ua tauaveina i le taimi nei e le Fono o Galuega fa'a-Misionare.

O lea o lo'o auai uma a tatou Ekalesia e pei ona i ai nei. Ua ou le mautinoa, po o ua toe i ai se **PICC** i Niu Sila. Po ua i ai fo'i nisi o le **CUNZ**, i le tatou mafutaga. A e o se taimi lelei lenei, e fa'ailoa ai le to'atele o lo'o auai i le *"The Presbyterian Church of Aotearoa, in New Zealand."* O lo'o tauavaeina fa'atasi ma le **CUNZ** i nofoa i totonu o le Fono o galuega fa'a-Misionare i le lalolagi, fa'atasi ai ma le **EFKS**, ma le **EFKAS**. E fa'aauau ai pea galuega o le **LMS**, sa fesoasoani i ai Atunuu i Misionare na auina atu; aemaise fesoasoani tau tupe ma nisi lava mea e mana'omia i galuega a Ekalesia ta'itasi.

**"Ia alofa le Atua ma fa'amanuia mai i le tatou Mafutaga" AMENE!**

**Dr. Rev Elia  
Ta'ase**



## **Fonotele Fa'afuase'i EFKAS 2025!**

O le fa'amoemoe ua taunu'u, o le la'au o le soifua lea. O le vi'iga ma le fa'afetai e fo'i i le Atua, ona o lona alofa ma lona agalelei ua mafai ai ona taunu'u le fa'amoemoe o lana Ekalesia i lenei fo'i tausaga. O le fa'amoemoe sa fau ao fau po, a'o le tōfā i Tamā o le Ekalesia, na saili i le Atua ina ia mafai ona fa'ataunu'uina. Na amata le Fonotele Fa'afuase'i a le EFKAS i le sauniga lotu, na ta'ita'iina e le susuga i le Ta'ita'ifono **Fa'aeteete Saifoloi FT.** O lea fonotaga na amatalia i le Aso 21-24 o Ianuari, ina ia talatalanoa nisi o mataupu mo le toe fa'aleleia o le Ekalesia ma ana galuega fa'agasolo.

I le mae'a ai o le sauniga, na fa'agasolo ai lea o le fonotaga e pei ona fa'atulagaina. O nisi o mataupu sa talanoaina, mo le toe fa'aleleia lea o nisi o maota o le Ekalesia i le Laumua i Kanana Fou. Sa faia le felafogaiga i Tamā o le Ekalesia ma komiti ese'ese, ina ia tasi se fa'amoemoe mo galuega fa'atino a le Ekalesia. O le talosaga mai a le Aoga Mauluga (*Kanana Fou High School*) ina ia toe fa'aleleia nisi o vaega o le faleaoga. O le fa'amoemoe, ina ia mausalī ma lelei mo le fa'aogaina e fanau a le Ekalesia. O nisi o galuega, o le fausia lea o nisi maota mo le fa'aogaina e faiaoga o le Kolisi Fa'afai'feau. Na talosagaina ai le mamalu ma le paia o Tamā o le Ekalesia, ina ia mafai ona faia ia galuega lelei mo le Laumua i Kanana Fou. E le gata i lea, na talanoaina ai fo'i le toe fa'aleleia lea o le Ofisa Tutotonu a le EFKAS, fa'atasi ai ma le fausia lea o se potu fono mo le mafutaga a Tamā o le Ekalesia. E 41 le aofa'iga atoa o Tamā o le Ekalesia ua i ai i lenei vaitau. O le silasila mamao ma le uta e fetu'una'i, ina ia fausia se fale fono fou mo fonotaga a Tamā o le Ekalesia. Fa'apea fo'i ma le toe fa'aleleia o lana Ofisa Tutotonu, o lo'o faia ai galuega mo le Ekalesia aoao. O nisi ia o mataupu sa mafai ona talanoaina i le Fonotele Fa'afuase'i a le Ekalesia i lenei tausaga. Sa tapunia lea fonotaga i fa'aaloaloga na saunia e nisi o Tamā ua fai ma Faifeau Toeaina i nisi o pulega a le Ekalesia Aoao. Na molimauna lo latou sagisagi fiafia ma le loto fa'agae'etia i lea fo'i aso. I le tele o tamāoaiga e ala i mea taumafa ma le 'oa na o latou fai mea alofa ai i Tamā o le Ekalesia.

A o le agaga fa'afetai e le mafai ona fa'aitiitia auā e ui lava o le Fonotele Fa'afuase'i, a e na matauina lava le omai fiafia o nisi o le Ekalesia e opogi lea fa'amoemoe ta'ua. E ui fo'i na utiuti le taimi ma Aso o lea fonotaga, a e na taumafai lava Tamā o le Ekalesia ina ia taunu'u manuia lenei fa'amoemoe. E momoli ai le agaga fa'afetai a le ofisa o le Lamepa i Tamā o le Ekalesia, i le fa'amaite mea lelei ina ia olaola pea le galuega a le Atua ua vala'uina ai tatou. Pau le tatalo, ia alofagia pea e le Atua le tatou savaliga o lenei tausaga, ina ia tatou aulia lena tausaga fono a le tatou Ekalesia. O a fo'i nisi o mataupu e le'i maua ni i'uga i lana Fonotele Fa'afuase'i, tatou tu'u i le Atua ina ia maua se tali mo le Ekalesia, i lana Fono usu i lena tausaga fou 2026.

**Saunia Charis Sao AKF**

\*\*\*\*\*



**Taula'i i le Atua e le o le Matagi**

E i ai alii faamasino toalua sa auai i se faamasinoga sa faia i Atunuu matagofie/Alaska. O le tasi e igoa ia Tavita, ma le isi e igoa ia Iakopo. Ina ua maea le faamasinoga sauni lea e toe fo'i o laua aiga i lea lava aso. Ua la taunuu i le malaevaalele. O le a sauni mo le siaki ina o laua atopau. Ae fateia i laua i le feiloai ifo o le Faifeau.

**Faifeau:** *Ua lua sauni e malaga?*

**Tavita:** *O lea lava.*

**Faifeau:** *O fea e te lua tau agai i ai?*

**Tavita:** *Taula/ Anchorage*

**Faifeau:** *O lo'u alofa ia te oulua, i le maimau o le lua seleni. O loo iai la'u vaalele, e tatou te o ai. E leai se totogi poo se tupe e faaalu mo le momoli ina o oulua.*

**Tavita:** *Faafetai i le agalelei. Ae ua uma ona totogi le ma pasese.*

**Faifeau:** *Oute alofa mo oulua, aumai i tua le lua pasese pe sefe fo'i mo se isi aso. Ae tatou malaga i la'u vaalele e leai se tupe e faaalu ai.*

Ua finau lava le faifeau ma toso o laua atopa'u i le taavale. Ona malilie lea o Tavita ma Iakopo e latou te o malaga ma le Faifeau. Ua latou taunuu i le fanua a le Faifeau, ma laua vaai atu i le ilaila manaia mai o le vaalele. O Tavita sa nonofo ma le Pailake i luma, ae nofo Iakopo i tua le nofoa o le pasese. Ua faaola le valele e le Pailake, faalogo ifo Tavita i le afi o le vaalele; o le afi fou lava. Ua minoi le vaalele ma agai i le auala vaalele, sauni loa mo le tuua o le laueleele. Ua minoi fo'i le valele ma alu saosaoa, ua tuua le laueleele ma ua saogalemu i luga o le ea. Peita'i, ua fateia Tavita ma Iakopo i le fai atu o le Pailake.

**Pailake:** *Malilie oulua. O a'u e faaeteete tele pe afai e fetai'a'i le vaalele ma le ao.*

**Tavita:** *Aisea?*

**Pailake:** *E pogisa uma ai lo'u vaai, ona ou leiloa lea o se mea e tasi.*

Ua fetai'a'i le vaalele ma le ao, ae vaai atu loa Tavita, ua moegase ifo lava le Pailake. Ona ia taumafai

lea e fagufagu i luga, ma o le mafaufau a Tavita i le taimi lea.

**Tavita:** *Se nofo mai ia i luga si alii lea se'i ua na faaoo i ai lona lima, aua o lea ua moegase, ae le'i taunuu le vaalele i le laueleele.*

Ona laua taumafai lea e faafesoota'i se isi e fesoasoani i le leitio, pe iai fo'i se isi e tali mai i le faalavelave lea ua tupu. O le faaletonu, e le iloa e Tavita ma Iakopo pe faapefea ona la talanoa i le ualesi o le vaalele. Na o le pau le upu e iloa e i laua o le, 'Hello!, Hello!

Pe a ma le 2minute, ae tali mai loa le Ofisa o loo mata'ituina vaalele feoi/ASR; Hello!, Hello!

**Tavita:** *Hello!*

**ASR:** *Aisea, ua le faaoga mai le gagana o le ualesi o vaalele?*

**Tavita:** *Faamolemole o lea ua moegase le Pailake, a o maua e le iloa ona faafoe le vaalele ma faaoga lo outou ualesi.*

**ASR:** *O ai lea o loo faaogaina le ualesi?*

**Tavita:** *O lou igoa o Tavita*

**ASR:** *O lea ua ou maua atu oe. O lea fo'i oute vaavaai atu, e foliga mai le vaalele e le toe mamao ae fetai'a'i loa ma le mauga e lata mai i le malae vaalele nei o Taula/Anchorage. Faalogo lelei mai Tavita. Afai e te faalogo mai i lo'u leo, e saogalemu outou faatasi ma le vaalele. Oute iloa e le mafai e oulua ona faafoe le vaalele. A o la'u matafaioi, o le fesoasoani i soo se faalavelave e tupu mai i vaalele ina ia saogalemu ola o tagata. Afai e te faalogo i lo'u leo, oute mautinoa le faasaogalemuina outou ola. Ae afai e te le usita'i mai i lo'u leo, e fano lou ola faatasi ma nisi o loo ia te oe.*

Ua musumusua ifo Tavita ia te ia lava, 'aisea ou te faalogo ai i le leo o lenei tagata aua oute le iloa o ia.

**ASR:** *Tavita?*

**Tavita:** *O a'u lenei.*

**ASR:** *Oute iloa e le faigofie, aua ua moegase le Pailate a o le matagi ma timuga ua fai si malolosi. E te le iloa mai a'u, ae ua na o lo'u leo o loo e*

faalogo i ai. Afai e motusia le taua fesoootaiga ona o le leaga o le tau, o lona uiga ua fano outou uma. O lea, afai o le a e faalogo ma usita'i mai i lo'u leo i le taimi nei, e taunuu manuia lo outou faigamalaga. Aua e te popole fua i le malolosi o timuga ma le afā. Ia e faalogo mai i lo'u leo, ma aumai ia te a'u lou faatuatua. Aua lava ne'i faalavelave ina oe i matagi malolosi, ae taula'i mai pea i lo'u leo. Oute ia te oe faatasi ma nisi o loo ia te oe, se ia faasaogalemu ina lo outou ola.

O lea lava taimi na faafesoota'i vave ai e le Ofisa mata'itu o vaalele i vaalele uma ina ia faaavanoa le malae vaalele, ma luga o le lagi, se ia faasaogalemu le vaalele o loo ua aga'i ifo i Taula.

**ASR:** Tavita, ia e talitonuina lo'u leo. Ia e faatuatua i na leo. O loo tele leo e taumafai e faalavelave ia te oe. O tagata uma fo'i o le lalolagi e mana'o ia e faalogo i o latou leo, ma latou taumafai e ta'iala oe i lo latou leo. Tavita, oute mana'o ia e faia se finauga faatasi ma a'u i lenei taimi pupu'u. Ia avea lo'u leo e fai ma lou leo a o e feagai ma le tau o afa, timuga ma matagi malolosi.

**Tavita:** Hello! Hello! O lea ua iloa atu le malae vaalele. Ua ou iloa le auala ma moli, o le ata o le satauro.

**ASR:** Ioe, o le ata faatusa lena na manumalo ai Iesu Keriso mai faaososoga ma faigata. O Iesu na faalogo i le leo o le Atua. E pei fo'i o lou faalogo mai i lo'u leo. Ua na faailoa fo'i ia te oe ala faigata, e pei ona e fetai'a'i ai ma timuga ma matagi malolosi. A o lou faatuatua, talitonu, faalogo, ma taula'i lou ola atoa i le leo. Ua faasaogalemu ai ola o nisi o loo ia te oe, faatasi ai ma lou ola.

O le taula'i i le leo o le Atua, po o le faalogo i lona suifofoga, e faasaogalemu ai le ola. O a lava le taaviliga o matagi ma afa malolosi, ia taula'i lava i le leo o le Atua.



## **Mo Tupulaga Talavou.**

### **O Laau e tolu ma o latou miti.**

O aso lava la ua leva i luga o se tumutumu mauga, sa tutu ai ni laau laiti e tolu ma latou faasoa ai e uiga i o latou miti. Ona tutupu a'e ai lea o latou lagona ma ua fai lea ma o latou moomooga e faaogaina ai i latou.

O le laau muamua na ia faasoa i le fia avea o ia ma pusa tuuoloo. Ia aoga e fesoasoani ai i timi o malaga. 'Oute mana'o fo'i ia u'u i lo'u lima ni auro, ario, ma taimane se tele, e faapei o se ma'a taua, e faamanatu ai pea lo'u taua.'

O le laau lona lua, na ia faasoa i le fia avea o ia ma vaa malos, e folau i le vasa loaloo ma le vasa tele. Oute fia avea fo'i ma vaa malos e ta'uta'ua e folau ai tupu ma tagata o le laloalgi.

O le laau lona tolu na ia faasoa e fia avea o ia ma laau e tupu maualuga. Ia mafai ona ia vaavaai atu i le lagi ma fetu o loo feom'emoa'i mai e pei o se taimane. Oute le fia tuua lava lenei mauga. A ia avea ma laau e tu matilatila, e ta'iala ai tagata ua leiloloo i le toafa. Oute mana'o fo'i ia avea a'u ma laau e aupito sili ona taua i le lalolagi.

Ua mavae le tele o tausaga, i le touulu ai o timuga ma le oso a'e o le la i lea vaitau ma lea vaitaimi. Ua tutupu a'e fo'i nei laau e tolu, ua oo ina matutua ma tutupu maualugā. O se tasi aso, na o a'e ai tagata i le toafa ma latou matamata i le uumi maualuga mai o nei laau. Ona latou tau fai a'ea'e lea i luga o lea mauga i le fia mauaina o nei laau. Ua latou maua ma vaavaai i le maoa'e fo'i o le tutupu a'e o nei laau. E fai le maualuluga, ae toe tino malolosi e fetai lelei mo soo se atina'e. Ona fai ifo lea o le tasi, se'i o tatou tuu i lalo nei laau, e iloa ai le taua ma le aoga.

Ua tuu i lalo le laau muamua, ona fai ane lea o le na tuua i lalo le laau. E fetai lelei le laau lea mo le fausia ai o se pusa oloa, e teuina ai ni oloa se tele. Ona alu ane lea o le isi, ua tuu i lalo le laau lona lua. Ua ia faapea ifo fo'i, o le a ou faaogaina lea laau aua e malos, mo le fauina o se vaa. O lea vaa, ou te folau ai i vasa e fia o le atu laulau.

Ona faliu ane lea o le isi ua vaavaai atu i le laau lona tolu. Ua oso a'e le lagona popole o le laau lona tolu ina ne'i le tau le faamoemoe o lona miti. Ona faapea atu lea o lea tagata i a'i latou na i ai, o le a ia lē tuua i lalo le laau lona tolu lea. Aua e le gata e tu sa'o i luga ma maualuga toetoe lava a pa'i lona tumutumu i le lagi. Ua fai atu foi o lea laau fo'i e mafai ona avea ma ta'iala i a'i tatou ma nisi e feoi i lenei toafa. Ona tuua lea e tagata o lea mauga ae toe aga'i i le aai.

O le laau muamua ua fiafia lava, ona o lea ua

taunuu lava lona miti faatasi ai ma lona manaoga. Ua ave ia te ia, ma tuu i le fale o le kamuta mo le fauina o se pusa tuu oloa. Ua uma ona fau ma ave loa e sauni e tuu i ai o oloa. Peitai, ua le tumu i oloa a ua tumu i vao mamago ma meaai mo manu. Ua lagona le le fiafia o le laau muamua ua fa'u'u lava o ia.

Ua ataata le laau lona lua i le mea ua tupu i le laau muamua. Ua ave fo'i le laau lona lua, ma tuu i le fale fau vaa mo le fauina o se vaa malosi. Ua uma ona fau, ua avea ma se vaa malosi ma e aupito i sili ona tele. A o le faalavelave ua tula'i mai, ua le mafai lava le mana'o tele o tagata i le fia fau pea o nisi vaa. Ona ave lea o le isi vaega o le laau lona lua, o le oagalaau e fau ai vaa laiti, ma fau ai ma vaa fagota. Ua lagona lava le le fiafia le laau lona lua. Aua ua manogi lalaoa o ia i aso e a'e ai se fagotaga/faiva. A o le laau lona tolu, o loo tu matilatila mai pea i luga o le mauga.

Ua mavae nai aso e tele, a o moomooga ma moemitiga o nai laau nei e tolu, toetoe lava a galo atu. Peita'i, i se tasi aso i le afiafi lea; ua pupula malosi ai le masina i luga o le pusa tuuolooa ua fai ma pusa e tuu i ai vao mamagao ma meaai o manu. Ae faateia loa i le 'au sulusulu atu o se ulugalii ma si a la tama o loo aui i le ie; e saili se mea mafanafana e mapu ai si o laua tama. Ona laua fetautalaa'i lea i se pusa e fai ma moega mo si a laua tama. Peita'i, ua iloa atu e le fafine le pusa ona valaau lea i lana tane, 'e faapefea lena pusa o loo tu mai, ua ave ifo, ona faapea lea o le fafine, leai la! e manaia lava si pusa meaai a manu lea, e fai ma moega o si a'u tama'.

Ua oso a'e le lagona fiafia o le laau muamua, ma ua tupu tele lona mimita. Ina ua taoto ia te ia le oloa aupito sili ona taua i le lalolagi. O se aso fiafia tele lea i le laau muamua, ma e le mafai ona galo ia te ia.

O se tasi fo'i aso ua o ane ai le alii ma ana uo i le ala, ua latou le lava ona ua alu le aso o savavali. Ua latou tau ane i le vaa fagota, ua fetautalaa'i se'i o latou sopoia vave atu i ai i le isi itu e vave ai ona oo. Ua latou o ae faateia loa i le agi malosi o le matagi ma le fafati o galu o le sami. Ua oso a'e le popole o le laau lona lua, aua e le tutusa lona malosi, ma le malosi o le matagi ua agi ifo, aemaise lona fetaia'i ma le peau o le sami. Ua ala ane le alii sa moe vaivai, ua ia savali ma tu i luma o le taumua o le vaa, ona ia faatonu atu lea i le matagi ma le galu o le sami, 'Filemu!'. Ona pe ai lea o le matagi ma malu ai le galu fafati o le sami.

Ona mapuna ifo loa lea o le lagona fiafia o le laau lona lua, aua ua ia iloa ma molimauina. O lea sa ia tauaveina le Tupu o tagata uma, a o le Tupu o le lagi ma le lalolagi. Ua le mafai le fiafia o le laau lona lua, ma o le a ia augofie e tauave lana matafaioi. I se tasi taeao a o lei oso a'e le la, ua te'i lava le laau lona tolu i le o ifo o tagata se toatele, ma latou tase'i mai ona oagalaau ma ave. Ua lagona lona fefe aua ua amo ia te ia i

faapotopotoga o tagata o loo iai foliga ita ma le faaoolima. Ua le maua se to'a i lona loto ona ua gatete ina ua ave ifo le pagota faataotoo i ona luga ua tutui i fao faatasi ma ia. Ua faatu i luga ma sunu'i i le eleele. Ua ia iloa atu le motu o tagata o loo vaavaai atu uma ia te ia, ma le pagota o loo tutui faatasi ma ia. Ua lagona lona maasiasi ma ia faapea ai, "aisea? Aisea, ua faasala faatasi ai a'u ma lenei tagata."

O lea lava taimi na ia faalogoina ai le feemoa'i o le uila mai le lagi. Ua vaelua le laueleele na sunu'i ai o ia faatasi ma le tagata o ia te ia. Ua luluina mauga ma fale e o'o lava i lalolagi ua peiseai, o le a faaumatia.

Ona faapea ane loa lea o le laau lona tolu, 'o lo'u gatete ma lo'u popole, lea ua liua i le olioli.' Aua ua ou iloa o le Alo o le Atua lea ua faasatauro faatasi ma a'u. O la'u fo'i tu matilatila faatasi ma le Alo o le Atua, i luga o lenei mauga, e faalototele atu ai i mea na foafoaina e le Atua, e toe faatupuina ma toe faatutuina e le Atua mea o i le lagi ma le lalolagi.

O le alofa o le Atua na faaogaina ai le laau muamua e tauaveina oloa taua, ma avea ma laau matagofie. Ua faaalua lava lea Alofa o le Atua i le laau lona lua e aupito i sili ona malosi. E faaosofia ai le ola galulue ma le taumafai. E aveesea ai le masalosalo ia faatuatua e mafaia mea uma e le Atua. Ia faalagolago i le Atua e nofo filemu ina loto popole ma faamalosi lagona ua faavaivai.

O lea lava alofa o le Atua ua faatoilalo le maasiasi ma le faalumaina. Ua aveesea ai le tiga ma mafatiaga, ae faaalua ai le alofa naunauta'i o le Atua i le foafoaga. Ua faaogaina e le Atua soo mea o i le foafoaga e pei o laau. Ua faaalua ma faailoa ai lona tausii alofa i le lagi ma le lalolagi. O le Atua ua na alofa fua mai, lea ua faatino mo le lalolagi agasala. (Ioane 3:16)



**SOLO FA'ALEAGAGA****“O PUSA E LUA NA TUU MAI E LE ATUA”**

Ua uu nei i o’u lima ni pusa se lua,  
Na tuuina mai ia te a’u e le Atua.  
O le pusa uliuli e tuu i ai o’u mafatia,  
A o le pusa auro ia faaputu ai o’u manuia.

Sa faapea loa ona ou fai,  
O manuia ma mafatiaga na faaputu i ai.  
Peita’i e tauau le pusa auro ina mamafa,  
A o le pusa uliuli sa māmā lava.

Na ou fia iloa le mafuaaga ua faapea ai,  
Sa ou tatala le pusa uliuli ma ou vaai loa i ai.

Na i ai se pu i lalo o le pusa,  
O loo to’ulu ai i fafo o’u mafatiaga uma.

Na ou faaali i le Alii le pusa ma la’u fesili,  
“O fea la o to’ulu i ai a’u avega lo’u Alii?”  
Na soiso le Alii ma Ona fofoga alofa,  
“O loo o’u tauaveina ia e sa’oloto ma lē pologa.”

“Aisea la na e aumai ai nei pusa e lua Tamā?  
O le auro ua tumu ma le uliuli e matuā māmā?”  
Tali mai le Alii, “O le auro ina ia faitau ou manuia,  
A o le uliuli e tia’i ese ai ma le manatua ou mafatia.”

Talosa ia tatou vaaia i le auro se tasi manuia,  
O ni uo se tele e le mafaitaulia;  
O isi na faamanuiaga a le Atua e sili ona manino,  
E maua e le tagata e ola mo isi ae le manatu faapito.

O isi faamanuiaga o ō tatou aiga ma lo latou alofa,  
Auā e le gata i aso uma o lo tatou ola.

Ola i aso ta’itasi ma faitau o tatou manuia,  
Vivii atu i le Atua o loo tauaveina o tatou mafatia.

**“IA FUA MATALA — O FEA LAVA O E IAI”**

Na ou faalogo i se leo e faapea mai,  
“Lo’u atalii/afafine, Fua — o fea lava o e iai.”  
Na ou tali, “Le Alii e, ua sinā lo’u ulu, ua ou vaivai.”  
“E le afaina,” o le leo ua toe tali mai.  
“O tagata uma e i ai o latou tāua,  
E oo foi i e ua faata’otolia ma ua soifua matutua.”

“Le Alii e, ua ou vaivai ua ou musu,  
O ai e toe faalogo mai, i sa’u upu?  
Ou te fia galue i se mea ou te mafai,  
A ua le lelei la’u faalogo ma la’u vaai.”

“Lo’u atalii/afafine e te le faatauvaavaa,  
E faapena uma la’u fanu ma o’u tagata,  
O loo ia te oe se alofa le faatusaina,  
E faamalosi atu ai i uso ma ou aiga.”

“Talitonu mai, oe la’u pele,  
I la’u upu e faitu;  
‘Aua loa e te toe tali mai,  
Fai le mea ua ou fai atu ai.”

Na ou su’esu’e la’u Tusi Paia,  
Ma amata ona ou faitau,  
Na ia te a’u le loto matala  
Ua oso ma lo’u naunau.

Na ou momo’o i mea faa fiafia  
Ma faatumu ai lo’u agaga,  
A o lea ua ta’u mai e le Atua  
E le o aafia ia mea i ana fuafuaga.

A ou loto alofa ma faamaulalo  
O la’u auaunaga sili lea,  
E maua so’u nofoaga i le lagi  
Ma ou sa’oloto i le mau mea.

Ua ou maua lenei meaalofa taua  
Ua ou iloa lona moni;  
Fua matala loa o fea lava o e i ai  
O lou Atua e aumaia lou olioli.

\*\*\*\*\*

## LISI O LE 'AUFAGALUEGA AGAVAA MO LE GALUEGA TAUSI 'AULOTU

O le lisi leni o le 'Aufaigaluega i Faifeau Samoa (FS) ma A'oa'o Kanana Fou (AKF) o loo avanoa ma agavaa mo le galuega tausī 'aulotu. Ua saunia leni lisi ona o le finagalo o le Fono Tele (FT:16-26), e fesoasoani ai i 'aulotu o loo tau saili ni o latou feagaiga. O suafa ia, e le gata o le 'aufaigaluega o loo galulue nei mo le Ekalesia Aoao i Kanana Fou ma le Ofisa Tutotonu, a o i latou foi o loo galulue fa'amaoni i tua i 'aulotu ma Pulega, e pei ona tu'uina mai e Failautusi o Pulega. Afai e i ai se faigaluega agavaa e le o i ai lona suafa i leni lisi, ia fa'afesootai mai le Ofisa a le Failautusi Aoao i le imeli: [gensec@efkasonline.org](mailto:gensec@efkasonline.org), e fa'alauiloa ai lou suafa i le taimi e toe lolomia ai le Lamepa.

### Kolisi Faafaifeau Kanana Fou:

Dr. Moreli Niutatoa FS, *Peresitene*  
Dr. Simi Mauga FS, *Sui Peresitene*  
Sasa Sotoa FS, *Teutupe Kolisi*  
(fa'amaonia e le 'Au Toeaina)

### Ofisa Failautusi Aoao

Paulo Lealaitafea FS  
Reynold Tagoa'i AKF

### Ofisa A'oa'oga Kerisiano:

Setefano P. Lefale FS, *Fa'atonu*  
Vili Polikapo FS, *Sui Faatonu*  
Penani Lefauseu FS  
Ronald Tuimauga AKF

### Ofisa Lamepa

Soosoo Tuiolemotu FS  
Tamilo Palepua AKF

### Aoga Mauauga Kanana Fou

Veteran Brown AKF  
Siaosi Suhren FS  
Gatai Patu AKF

### Pulega Fale-Ta'u:

Ioane Ioane FS (Fitiuta)

### Pulega Sua:

Ioane Peleti FS (Fagaitua)  
Waiana Tanielu FS (Masausi)  
King Talamoni FS (Amaua)  
Reynold Tagoa'i AKF (Laulii)  
Magaga Talo AKF (Masefau)

### Pulega Sa'ole:

Setefano P. Lefale FS (Auasi)  
Vili Polikapo FS (Amouli)  
Edward Semaia FS (Aunuu)

Siavao Iese FS (Alofau)  
Pou Tauaa FS (Alofau)

### Pulega Fagaloa Sisifo:

Tumau Petaia FS (Fagaalu)

### Pulega Fagaloa Sasa'e:

Poutoa Leituala FS (Pago Pago)  
Tamilo Palepua AKF (Pago Pago)

### Pulega Itu'au

Isaako Matautia Jr FS (Fagasa)  
Vagana Saili FS (Matuu & Faganeanea)

### Pulega Tafa o Kanana Fou

Penieli Tela FS (Petesa Tai)  
Tupuivao Ioelu FS (Petesa Tai)  
Siaosi Shuren FS (Ieruselema Fou)  
Gatai Patu FS (Petesa Uta)

### Pulega Tualatai:

Daru Ulutu FS (Malaeloa)  
Sinaka Ulutu FS (Malaeloa)  
Amaamalele Tofaeono FS (Taputimu)

### Pulega Tualauta:

Folauga Tupuola FS (Iliili)  
Penani Lefauseu FS (Faleniu)  
Veteran Brown AKF (Iliili)  
Ronald Tuimauga AKF (Vaitogi)

### Pulega Alataua:

Tasele Tuigamala FS (Leone)  
Soosoo Tuiolemotu FS (Poloa)

### Pulega San Francisco:

Moegagogo Tamasese FS  
Eliu Eseroma FS (Daly City)  
Ketese mane Tagaloa FS (Sacramento)

Peter Fualaa FS (Sacramento)  
Vaise Poloka AKF (Sacramento)  
Euta Asifoa AKF (Oakland)

### Pulega Santa Clara:

Vai Malaulu FS (Tafatolu)

### Pulega Seattle:

Talosaga Patea FS (Seattle IV)

### Pulega Alaska i Matu:

Poasa Maui FS (Faavae Fou)

### Pulega Alaska i Saute:

Tomasi Foilefutu AKF (Feagaiga Fou)

### Pulega LA Matu:

Sugalua Filivaa AKF (Ola Fou LB1)  
Malaki Tauiliili FS (Ola Fou LB1)  
Emosi Liaina FS (Ola Fou LB1)

### Pulega LA Saute:

Mose Mose FS (USC)

### Pulega Las Vegas:

Samuelu Tialavea FS (FOLA)  
Liavaa Moevao FS (FOLA)

### Pulega Amerika Sasa'e:

Tata Falaile AKF (Vaomoana)

### Pulega Aukilani:

Tautalaaso Asiata FS (Ranui)  
Faiagaga Leota AKF (Wiri)  
Iulio Pati AKF (Wiri)

## LISI O 'AULOTU AVANOA

O nisi ia o 'aulotu o le EFKAS ua avanoa i le taimi na lolomi ai leni Lamepa, o le a aoga ai leni lisi e saili ai so latou faifeau:

EFKAS Afono  
EFKAS Amanave  
EFKAS Kanana Fou, HI  
EFKAS Toafa ole Talalelei, AZ

IA SILAFIA: O 'ATA UMA O LE LAMEPA, E MAFAI ONA E MAIMOVA AI I LUGA O LE UPEGA TAFAILAGI, I LE TUATUSI:

<https://www.facebook.com/LamepaEFKAS/photos>



**EKALESIA FAAPOTOPOTOGA KERISIANO I AMERIKA SAMOA**

1 Kanafou Fou St, P.O. Box 1537, Pago Pago, Amerika Samoa 96799

Phone: +(684) 699-9810 website: <https://efkasonline.org>